



Et hät och esu gegange

Kei Nettche, kei Settche, dat schlog de Lavumm.
Mer soch keine ‚Löhgasser Ritter.
Mer hoht och kei Solo, wie söns op d`r Trumm,
vun Andrees, vun Schäng oder Pitter.
Et Nieß, wat sich Marketenderin maht,
et sonndags wor nirgens zo finge.
Kein Zög un kei Ständcher wohte gebraht,
kei Leedche, wie söns, hoht mer singe.
Et flog uns kein Appelezin op dt Aug,
die Mondags vum Wage geschmesse.
Mer wohd nit gequätsch, keine Stöbb engesaug,
och söns hat mer nix o`m Gewesse.
Ich mein, dat m`em Bütze sich keiner verdonn,
dat wör jo och schließlich noch schöner.-
D`r ‚Pitsch hat och nit op d`r Speissekaat stonn
wie söns: Heute ‚Festtagstrakehner .
Kein Lißger met Harfe wore zo sin,
die Samstags de Schlagere brahte.
Kein Trumpett, kein Gitta und kein Vigelin,
wo drop sei ihr, mtata mahte.
Dat eß doch geweß e Zeiche d`r Zick,
die Kölsche, die söns esu fruh,
se han et bewesse - se han et gezeig,
wenn et sin muß, dann geht et och su.